



Uunga siunnersuut: Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaat nr. xx, xx. xxx 2018-imeersoq.

(Inqarnermut Attaveqaaqatigiinnermullu Naalakkersuisoq)

(Pingajussaaneerinneq)

Inuit tamaqqinnaatta kissaatigaarput siuariartortoqarnissaa atungarissaarnerunissarpullu. Politikerit tamaqqinnaatta siunertaarput siuariartortoqarnissaa atungarissaarnerusoqarnissaalu.

Amerlaqisut isumaqarput siuariartorneq atungarissaarnerunerlu pissutsit ingerlarngat allanngunngikkaluarlugu anguneqarsinnaasut. Tamanna kukkuneruvoq.

Inuiaqatigiinni unammilligassagut pitsaanagerusumik unammisinnaassagutsigit, aamma ineriartorneq annerusoq ingerlassinnaassagutsigu, taava angisuumik takorluuisinnaassuseqartariaqarpugut, aamma alloriarusussuseqartariaqarpugut.

Demokraatit partiitut tassaakkajuppugut siunertatsinnik ersarissuliornissamut tunuarsimaaruteqarneq ajortut – aamma qisuariaataasussat ernumagiinnarlugit tunuartertannngittut. Mittarfissuit eqqartorneqaaqqaalermatali, partiitsinni siunertaq taperserparput, ersarissartuarsimallugulu qulakkiigassat isumannaattumik suliarineqarnissaat, soorlu assersuutigalugu akilersinnaassutsimut aamma aningaasalersuinerlut tunngasut. Tamannarpiarlul sulinitsinni qitiutissimavarput, qulakkeerusukkatsigumi inuiaqatigiinnut nammakkersuinnginnissaq, killormulli siuarsaanissaq.

Politikeritut sulinermit suliaasat ilagaat nunap siulersornera. Allatut oqatigalugu uangut qinikkat tassaavugut innuttaasunut siulersuisut, tassa sullissisut. Taamaammallu pisussaaffitsinnut ilaavoq inuiaqatigiit sumut ingerlanissaat tikkuutissallugu, ersarittumillu oqaatigissallugu qanoq anguniarnerlugu.

Piffissami matumani politikkikkut anguniakkatsinni annerpaatut taasinnaasarpugut tassaavoq politikkikkut namminersulivinnissaq. Tamanna angusinnaajumallugu inuiaqatigiittut toqqammavippugut nukittorsartariaqarlugu ilisimavarput, soorlu inunnik isumaginninnermi, atuartitaanermi ilinniartitaanermilu, kiisalu aningaasarsiornermi. Demokraatini isumaqavippugut maanna eqqortumik allorialerluta. Alloriaatissarpummi tassaavoq nunap tamarmiusup aningaasarsiornikkut siuariartinneqarnissaa.



Oqaluuserisami matumani illoqarfiit marluk maanna angallannikkut ornigarneqarpaasut mittarfissuartaarterpagut, taamaasiornikkullu angalasut sumukarfimminnut toqqaannartumik tikittartut amerlerujussuassapput. Oqaluuserisami matumani aamma nunap immikkoortuani mittarfiliulerpugut, tassuunakkut aamma angalasut allat sumukarfimminnut toqqaannarnerujussuarmik angalasinnaalissallutik. Allatut oqaatigalugu angallannikkut eqaallisaaneq annertoq toqqammavissilerparput, aningaasarsiornikkut annertuumik pitsanngorsaataasussamik. Tassuunakkut niuernerminunatut imminut nukittunerulertilerpugut, tassami unammillersinnaassuserput naammassisaqarsinnaassuserpullu annertusisussanngoratsigit.

Suliniutip samminerani sammineqarnerit ilagaat suliniutip aningaasalersorneqarnissaa. Ukiopassuarni avataaneersut aningaasaliiumassuseqarnissaat politikikkut ataatsimoorfigalugu nilliaatigisareerparput. Taamaakkaluartorli maannamut annerusumik iluatsissimangitsutut taasariaqarparput. Uani suliniummi maanna alloriaataasumik iluatsittussanngortorlu, akerliullutik nilliasut amerlapput. Akerliunermilu toqqammavilersuutiginiarneqartut ilagaat nunatut politikikkut kiffaanngissutsitta ilaa danskinut tunigipput. Naqissuserlara taamaattoqanngilluinnarmat.

Suliniutip samminerani aamma sammineqartut ilagaat illoqarfiit aaliangersimasuinnaat pineqarnerat. Naqissuserlara Demokraatini manna suliniut alloriarnertut siullertut isigigatsigu, taamaammallu alloriarnerup tullia tassaamat nunap immikkoortuini allani angallannikkut iluarsartuussinissaq, aamma inuutissarsiutitigut periarfissaasut aallaavigalugit ineriartortitsinissaq. Taamaasiornikkut nunatta namminersulivinnissaa tigussaasumik alloriarfigissuarput.

Naggasiutigalugu naqissuserusuppara Demokraatini akuersilluta taasissagatta. Suliap suliarinerani suleqatigisimasagut tamassi qujaffigaatsigit, tassa akuerseqataallutik taasisut Siumukkut. Aamma suliniutip ingerlanerani nikerartunik isumaqartarsimasut, piffissamilu kingullermi akerliorujussuarnerarsinnarlutik, maanna akuersinatillu itigartitsinnginnerartut qujaffigaatsigit, itigartitsisullumi.

Suliniut maanna timalertussanngorpoq, tassa imaappoq suliaq politikikkut aaliangiiffigivarput. Suliassaq tulleq tassaavoq innuttaasut suliffeqarfiillu akisussaaqataallusi kivitseqataanissarsi. Ilissi najungaqarfissinni periarfissat aallaavigalugit ineriartortitseqataassuusi.

Naggataagut naqissuserusuppara nunatta pisariaqartimmagu politikerit siunissamut ungasinnerusumut takorluugaqarsinnaasut, aamma aaliangiisinnaassuseqartut, pissutsillu ilungersunarsitillugit akisussaaftimmik tigusisinnaasut. Qaammatalunnguit matuma siorna nunatsinni politikikkut ilungersunartorsiortoqarpoq, ikerinnakkullu qinersisariaqarnissaq qanillisorujussuungalualuni. Qiersisoqarsimasuuppat partiitut siuariesimassagunaraluarpugut. Uanguilli partiitsinni aaliangersimavugut nunatta pisariaqartitai nammineq partiitta



ineriartoqqinnissaanit salliutissallugu, ullumikkullu tamassumap kingunera maanna takusinnaavarput, tassami Inatsisartuni amerlanerussuteqarluartut ineriartortoqarnissaa siuariartortoqarnissaalu akuerimmassuk. Tamanna assut tulluusimaarutigaa, taamaammallu parteeqatikka tamassi qujaffigaassi.

Taamatut oqaaseqarlunga nalunaarutigaa Demokraatini suliniut taperseratsigut.